

Nota e consecuencianan di exceso di zonido

Actividadnan ruidoso den aire liber ta sigui ta molester

Oranjestad – E molester di mas grandi semper ta keda causa pa nos hendenan mes cu no ta tene cuenta cu otronan. Pero ta keda cu e speranza cu e “barionan 5 strea” cu tanto Prome Ministro Sr. Eman como Ministro encarga cu Infraestructura, Sr. Sevinger, ta papia di dje lo trece alivio back. Nos Gobierno ta trahando duro pa embeyece nos isla, y nos como ciudadano tin e deseo y ta hasta convenci cu lo tene cuenta cu un di e derechonan principal cu cada ciudadano tin, esta tranquilidad den nan propio hogar (woningsgenot)!

DIFERENTE BARIO

Ta conoci cu diferente bario aki na Aruba tin hopi molester di exceso di zonido. Nos por menciona por ehempel e bario di Piedra

Plat cu tin molester di PP Entertainment Center, lesnan cu ta biba rond di Parke Arawak, esunnan cu ta biba rond di Plasa Betico Croes, e vecindario di Club 21 den Caya Betico Croes, den cercania di Centro di Bario Tanki Leendert y tambe lesnan cu ta biba cerca di La Ronda. Mester menciona cu e habitantenan di tanto e vecindario di La Ronda como Club 21 a hasta gana nan caso den corte. Pues, tin hurisprudencia caba pa locual ta trata e dB (decibel) maximo cu ta permiti.

Un fenomeno nobo cu a lanta cabes ta e molester di exceso di zonido cu ta wordo causa pa botonan di placer cu ta hancra cerca di costa di Aruba. Habitantenan di p.e. Arashi y Malmok tin di haber casi

diariamente cu esaki. E molester aki ta aumenta den fin di siman y e temporada di vakantie ora tin campamento y hasta ora organisa caminatanan (e.o. di IDE-FRE).

CASONAN DEN PASADO

Por menciona tambe cu algun aña pasa algun bisña den bario di Oranjestad (Mon Plaisir) tambe a entama un caso contra Lotto pa Deporte/Aruba Entertainment Center pa motivo di molester di exceso di zonido. E bisñanan aki tambe a gana nan caso den corte. Hues a dicta cu mester a para tur actividad den Aruba Entertainment Center te ora yega na un solucion of compromiso entre demandantenan y Lotto pa Deporte. Partidonan a yega na un schikking bao

cierto condicionnan cu por cierto no a cumpli cu nan ainda.

Ultimamente por nota cu rond di Aruba ta organisando actividadnan den aire liber pa loco y gobierno y polis ta dunando permiso sin tene cuenta cu e iritacion y consecuencianan cu e exceso di zonido cu esaki ta trece cun'e. Apestar cu verbalmente a haci diferente suplica na direccion di e instancianan concerni y hasta na Ministro di Husticia, mr drs Arthur Dowers, pero ta parece cu nan preocupacion, pena y sufrimiento no ta haya oido. Lo ta di recomenda na instancianan concerni pa hancra den cada permiso otorga un maximo di dB. Si supasa e cantidad di dB por ehempel por tuma aparatonan di zonido den beslag, of

por duna un boef of no duna e instancia/persona un permiso mas pa actividadnan similar. Asina so lo por disciplina nos hendenan pa yega na un tranquilidad hogareño garantiza.

FUNDACION

Basa riba diferente casonan di exceso di zonido rond di Aruba un fundacion pa combati exceso di zonido a lanta na october 2008, “Stichting ter Bestrijding van Geluidsoverlast” (SBG). Meta principal di e fundacion aki ta defende e interes di nos ciudadanonan riba e derecho di un bida tranquil. Esaki por wordo garantiza solamente si nos mes tene cuenta cu nos conciudadanonan ora di tene actividadnan den aire liber. Hasta ora di pone musica na cas y resamento (of misa) riba p.e. Plasa Betico Croes. E ultimonan aki ta birando un fenomeno cu ta causando hopi problema y disgusto. Y pa yuda nos autoridadnan den e meta pa trece y respeta tranquilidad den cada hogar aki na Aruba, SBG a traha duro y a regala nos cuerpo policial diferente “sound level meters” (SLM). Nos tin entendi cu SBG a duna presentacion di e aparatonan aki, pero nos cuerpo policial no a yega na uza esakinan te ainda pero e tin nan atencion. Multiple estudio a demostra cu exceso di zonido por causa presion halto, problema di respiracion, aumento di tension muscular, y hasta exceso di zonido por ta un factor di riesgo mas halto cu colesterol! Tambe exceso di zonido por causa disturbio di sueño. Algun hende ya por tin molester na 45dB. E profundidad di sueño ta wordo afecta relativamente door di desordo. Pa por tin un sueño optimal mester tin un nivel di zonido no mas halto cu 40 dB. Insuficiente sueño por conduci na nerviosidad y disminucion di capacidad di competencia y menos tolerancia.

Continuacion di Pagina 4

LEY AMBIENTAL

Na 2011 un comision cu tin bienestar di nos ciudadanonan na pecho, cu participacion di Sr. Gisbert Boekhoudt, Sr. Henry De Cuba y y Sr. Gino Wever como miembro, a wordo lanta cu e obhetivo di traha riba e concept di e Ley Ambiental.

Tur tres persona menciona ta emplea na Inspeccion Salud Publico y Medio Ambiente y a duna splicacion general di e obhetivo di e ley, cua ta e areanan principal y e elementonan legal, manera permiso y responsabilisacion. Na juni di aña pasa durante un encuentro entre e comision y empleadonan publico cu ta resorta bao Ministerio pa Asuntonan di Medio Ambiente y representantenan di diferente organisacionnan a topa. E intencion di e encuentro aki tawata pa duna mas splicacion di e concepto di ley, pero tambe pa scucha di e organisacionnan aki cu tin hopi tempo caba ta pidi pa un ley asina, kico ta nan sugerencianan. E concepto entre otro ta encera cu tur organisacion of compania cu kier desplega un actividad cu ta trece peso pa medio ambiente, sea riba tereno di exceso di zonido, destruccion di paisahe natural of cu tin efecto riba flora y fauna mester cana proceduranan legal cu ta inclui e MER prome cu Minister por otorga permiso. Mas ainda, e ley ta provee e espacio pa berdad monitor si e companianan ta cumpli cu nan obligacionnan. E iniciativa di e comision aki ta di aplaudi pero, nos ta curioso pa sa kico a pasa cu nan y kico a sali for di e encuentro aki ya cu no a tende nada mas di e comision aki.

PROYECTO MINISTER VISSER

Recien Minister di Salubridad Publico y Deporte, Dr. Richard Visser, a expresa durante e conferencia di prensa na ocasion di e evaluacion di e resultadonan di e proyecto di implante "cochlear" cu mester bin un ley cu ta regula e decibel durante eventonan, manera concierto. Den un comunicado di gobierno e mandatario a

splica cu tin nuebe ley den pipeline, entre otro e BIG wet, un ley pa ambulance y ley di inspectie. E ley pa regula decibel lo hunga un rol importante den prevencion di daño na oido, cual ta permanente.

Dr. Visser a splica cu e cirugía di implante "cochlear" no tabata riba presupuesto

di AZV, pues gobierno a cubri'e y cada operacion a costa entre 80 pa 90 mil florin.

E mandatario a accentua cu mester traha hunto pa evita cu e cirugía implante "cochlear" aki bira necesario pa via di motibonan cu no ta genetico of enfermedad y e regulacion di deci-

bel lo yuda grandemente den esaki. Aki ta unda cu nos lo sugeri Ministro Visser pa sinta hunto cu su colega Ministro Dowers y cuminsa prome na pone un paro na e actividadnan cu exceso di zonido (den aire liber) cu no ta contribui na salud di ningun hende, al contrario! Ta keda cu e anhelo pa

pronto lo introduci e "barionan di 5 strea" pa porfin tur hende por disfruta di e tranquilidad y paz cu nos tin derecho riba dje den nos hogarnan, na unda exceso di zonido lo bay pertenece na pasado y lo bay pone un paro na actividadnan, conciertonan, misanan den zonanan residencial. □